

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq saqqummiupparput:

Assartuussinermi ataatsimut akissaajaatit annikillisinnissaat, timmisartuussisarnerup akulikillinissaa aamma unammilleqatiginnerup annertusisinaanera siunertaralugit Mittarfinnik sanaartorneq pillugu Inatsisartut inatsisissaattut siunnersuummik qinigaaffimmi matumani Naalakkersuisut saqqummiussinissaannik peqquneqarnissaannut Inatsisartut aalajangiiffigisassaattut siunnersuut. Tamanna pissaaq mittarfiit, qulimiguullit mittarfiisa akunnisimaartarfiisalu piusut amerlanerpaamik 19-inut ilaasoqarsinnaasunut mittarfinnut millilernerisigut aamma allilernerisigut.

(Inatsisartunut ilaasortat: Anders Olsen, Siumut, Jens-Erik Kirkegaard, Siumut, Tillie Martinussen, Demokraatit, Ane Hansen, Inuit Ataqatigiit, Kalistat Lund, Inuit Ataqatigiit)

Tunngavilersuutit:

Naammaginaratumik akuttussusilimmik naammagisimaarnartumillu akikitsumik, eqaatsumik sunniuteqarluartumillu angallassinermik periarfissiinissamut mittarfiit atorpeqassapput.

Suluusalinnut mittarfinnik angisuunik sanaartornermi Sanaartornermut ataatsimiititaliap isumaa malillugu piffissap ingerlanerani ilaatigut sanaartorpallaarsimavugut. Tamanna ilaatigut mittarfinni ataasiakkaani naleqqutinngitsumik annertuumik ingerlatsinermut akissaajaateqarnermik kinguneqarsimavoq, peqatigisaanillu angallassinermut akissaajaatit akitsornerisigut ikittuinnaat timmisartornissamut akissaqalersimapput.

Taamaattumik mittarfiit minnerit arlallit timmisartunut amerlanerpaamik 19-inik ilaasoqarsinnaasunut millilernerqarnissaat kaammattuutigineqarpoq, taamaalillutillu mittarfinni ataasiakkaani ingerlatsinermut akissaajaatit aamma mittarfinnut akitsuutit annikillisinneqarsinnaapput. Atortuutinik aamma inuttanik immikkut ilisimasalinnik akissajaataaffiuqisunik annikinnerusumik pisariaqartitsilernikkut ingerlatsinermut akissaajaatinik sipaaruteqartoqalissaaq. Taamaalilluni neriuutigineqarpoq timmisartut mikinerit atorlugit sapaatip akunnikkaartumik aallartarnerit amerlineqarsinnaasut, kiisalu angalanermut ataatsimut akissaajaatit appartinneqarsinnaasasut.

Kaammattuutigineqarportaaq qulimiguulinnut mittarfiit akunnisimaartarfiillu arlallit timmisartuaqqanut suluusalinnut amerlanerpaamik 19-inik ilaasoqarsinnaasunut allilernerqarnissaat, taamaalillutik akulikinnerusumik timmisartuussinerit naammassineqarsinnaassallutik, peqatigisaanillu timmisartuussineq ingerlatsinerlu akissaajaatikinnerunermik kinguneqartussaalluni.

Amerlanerpaamik 19-inik ilaasoqarsinnaasunut timmisartunut mittarfinnut aningaasaliinikkut assartuussinermut akissaajaatinik aamma nalinginnaasumik angallattunut napparsimasunillu angallassinermi sipaaruteqartoqarsinnaasaaq.

Inatsisartuni amerlanerussuteqarsinnaasut nikerarnerat apeqqutaatinnagu attaveqatigiinnermut aningaasaliinerit tapersorsorneqarluartumik suliniutinik naalakkersuinikkut attanneqarsinnaasumik naalakkersuinikkut isumaqatigiissuteqartarnissat pisariaqarput.

Tigussaasumik sipaaruteqarfiusinnaasut akuttussutsikkullu sunniuteqarfiunngitsut mittarfiit piusut amerlanerpaanik 19-inik ilaasulinnut millilerneqarnissat taamaalillutik siunnersuutigineqarput.

Siunnersuutip pisortanut aningaasatigut allaffissornikkullu sunniutissai

Siunnersuut sanaartornermut aningaasaliissutinik kinguneqassaaq, tamannalu aamma timmisartuutit qulimiguuliillu pigisat aserfallatsaalineqarnerinut ingerlatsinermit akissaajaatinik ikinnerusunik kinguneqassaaq, kiisalu mittarfinni millilerneqartuni ataasiakkaani ikinnermik sulisunik kinguneqassalluni.

Napparsimasunik angallassinermi siunnersuut annertuumik sipaaruteqarnermik kinguneqassasoq aamma naatsorsuutigineqarpoq.

Ataatsimut isigalugu piffissap sivisuallaanngitsup ingerlanerani siunnersuut inuiaqatigiinni aningaasaqarnermut iluaqutinik kinguneqassaaq.

Inuussutissarsiutinik namminerisaminnik ingerlataqartunut aningaasatigut allaffissornikkullu sunniutissat

Sanaartorerup nalaani siunnersuut annertunerusumik suliffissaqartitsinermit kinguneqassasoq naatsorsuutigineqarpoq, tamatumalu kingorna angallannerup ingerlanneqarneranut pitsaanerusumik sinaakkusiissalluni.

Siunnersuutip innuttaasunut aningaasatigut allaffissornikkullu sunniutissai

Inoqarfiit minnerusut akulikinnerusumik timmisartuussiffigisalernissaannik siunnersuut kinguneqassasoq naatsorsuutigineqarpoq, peqatigisaanillu ilaasunut ataasiakkaanut ilaasumut akitsuut annikillisinneqassalluni.